

# Lög Sáttar

## 1. gr.

### Félag um sáttamiðlun

Félagið heitir Sátt og er félag um sáttamiðlun á Íslandi. Félagið skiptist í tvær deildir, almenna deild sem er opin öllum félagsmönnum og fagdeild sáttamiðlara sem er opin fagfólki sem lokið hefur námi í sáttamiðlun og hefur áhuga á að sinna sáttamiðlun.

Lögheimili félagsins og varnarþing er í Kópavogi.

## 2. gr.

### Skilgreiningar

Sáttamiðlun er lausnamiðuð sáttumleitun í ágreiningsmálum milli einstaklinga, eins eða fleiri, milli einstaklinga og lögaðila eða milli lögaðila. Sáttamiðlari er óhlutdrægur þriðji maður, sem aðstoðar þá sem vilja þannig freista þess að leysa ágreining sín í milli.

Með orðinu sáttamiðlun er átt við það sem nefnt er mediation, mekling, rettsmekling eða megling á erlendum málum.

## 3. gr.

### Félagsaðild

Sátt er opin öllum þeim sem hafa áhuga á sáttamiðlun og vilja vinna á einn eða annan hátt að framgangi sáttamiðlunar við lausn á ágreiningsmálum á Íslandi. Félagsmenn sem lokið hafa námi í sáttamiðlun geta einnig sótt um aðild að fagdeild sáttamiðlara innan Sáttar. Félagar í fagdeild Sáttar skulu hafa lokið háskólaprófi.

Markmið félagsins er að vinna að framgangi sáttamiðlunar á Íslandi og að það verði viðurkennt úrræði við lausn ágreiningsmála. Félagið vinnur einnig að skipulagningu viðurkennds náms hérlandis í sáttamiðlun, sem veitir réttindi til að vera sáttamiðlari vegna ágreinings sem risinn er eða er til meðferðar fyrir dómstólum, stjórnvöldum og á öðrum vettvangi.

## 4. gr.

### Tilgangur

Tilgangur félagsins er að vera sameiginlegur vettvangur þeirra sem hafa áhuga á að nýta sér sáttamiðlun og þeirra sem vilja stunda sáttamiðlun og afla sér menntunar á því sviði og stuðla að því að slík menntun bjóðist hér á landi. Félagið skal m.a.:

- vinna að skilgreiningu á starfssviði sáttamiðlara,
- stuðla að því að komið verði á viðurkenndu námi í sáttamiðlun hér á landi sambærilegu viðbótarnámi fagfólks í Evrópu,
- stuðla að því að sáttamiðlun verði viðurkenndur valkostur við aðrar leiðir til að leysa ágreining í samfélaginu,
- vera vettvangur endurmenntunar, fræðslu og upplýsinga um sáttamiðlun fyrir félaga og aðra sem áhuga hafa á viðfangsefninu,
- mynda tengsl við sambærileg félög í öðrum löndum,
- vinna að framgangi sáttamiðlunar eftir því sem stjórn félagsins ákveður hverju sinni.

## **5. gr. Stjórn**

Stjórn félagsins skal kosin á aðalfundi félagsins. Stjórnina skipa fimm félagsmenn sem kosnir eru til tveggja ára í senn. Formaður skal kosinn sérstakri kosningu en aðrir stjórnarmenn skulu skipta með sér verkum varaformanns, ritara, gjaldkera og meðstjórnanda. Stjórn vinnur eftir starfsreglum stjórnar. Þá skulu á aðalfundi kosnir tveir skoðunarmenn.

## **5.1. gr. Sérstakar nefndir**

Stjórn Sáttar er heimilt að skipa nefndir og undirdeildir til þess að starfa með stjórninni að tilteknum málaflokkum og stefnumálum þess. Stjórn Sáttar semur starfsreglur þeirra. Slíkar nefndir og deildir skulu gera grein fyrir störfum sínum til Stjórnar Sáttar einu sinni á ári eða oftar eftir þörfum.

## **6. gr. Listi yfir starfandi sáttamiðlara**

Félagsmenn í fagdeild Sáttar geta óskað eftir því við stjórn félagsins að komast á lista yfir starfandi sáttamiðlara sem birtur er á heimasíðu félagsins.

Félagsmaður sem óskar eftir að fara á listann skal lýsa því yfir með skriflegum hætti að hann muni fylgja siðareglum Sáttar að öllu leyti og sinna starfi sínu sem sáttamiðlari af kostgæfni og fagmennsku. Sáttamiðlarar skulu einnig fylgja alþjóðlegum siðareglum sáttamiðlara.

Jafnframt skal hann leggja fram ferilskrá og staðfestingu á námi á sviði sáttamiðlunar, auk upplýsinga um sérhæfingu á sviði sáttamiðlunar sem birtar eru undir nafni viðkomandi á heimasíðunni ef beiðni hans er samþykkt.

Sáttamiðlari skal hafa lokið viðeigandi menntun á sviði sáttamiðlunar sem nemur 5 ECTS einingum, eða sambærilegum fjölda kennslustunda. Stjórn Sáttar skal meta í hvert sinn hvort að menntun félagsmanns uppfylli framangreint skilyrði, en einnig er heimilt er að líta til annarrar menntunar og reynslu sem nýtist sáttamiðlara í störfum sínum.

Stjórn Sáttar er heimilt að setja sáttamiðlurum í fagdeild skilyrði um að viðhalda þekkingu sinni ef þeir vilja vera áfram á lista yfir starfandi sáttamiðlara. Stjórn skal boða til fundar fagdeildar með a.m.k. 3 vikna fyrirvara og skal sá fundur móta tillögu um skilyrði til endurmenntunar, sem lögð er fram til stjórnar sem tekur ákvörðun um endanlega niðurstöðu. Stjórn Sáttar sér ennfremur um að framfylgja samþykktum skilyrðum um endurmenntun.

## **7. gr. Félagsgjöld**

Heimilt er að krefja félagsmenn um félagsgjöld og skal stjórn leggja fram tillögu að félagsgjöldum til samþykktar á aðalfundi félagsins. Félagsmenn sem ekki hafa greitt félagsgjöld falla af félagaskrá þegar 1 ár er liðið frá stofnun kröfu.

Starfandi stjórnarmenn Sáttar eru undanþegnir félagsgjöldum, en teljast engu að síður hafa kosningarétt á aðalfundi félagsins.

Heimilt er að krefja utanfélagsmenn og þá félaga sem ekki hafa greitt félagsgjöld um hærri þátttökugjöld á ráðstefnur, námskeið og aðra dagskrá á vegum félagsins en skuldlausu félagsmenn.

**8. gr.**  
**Aðalfundur**

Aðalfundur skal haldinn á fyrsta ársfjórðungi ár hvert. Á aðalfundi skal fjallað um skýrslu stjórnar, fjárhagsmál félagsins, lagabreytingar og önnur mál löglega upp borin og ákveða árgjöld félagsmanna. Tillögur um lagabreytingar skulu berast stjórn félagsins minnst tveimur vikum fyrir aðalfund.

Boða skal til aðalfundar með dagskrá bréflega eða með tölvupósti með fjögurra vikna fyrirvara. Lagabreytingatillögur stjórnar fylgi fundarboði.

Félagsmenn sem ekki hafa greitt félagsgjöld hafa ekki kosningarétt á aðalfundi félagsins. Reikningsár félagsins er almannaksárið.

**9. gr.**  
**Gildistaka**

Lög þessi öðlast gildi á aðalfundi félagsins sem boðað hefur verið til með lögmætum hætti.

**10. gr.**  
**Slit félagsins**

Verði uppi óskir um að leggja Sátt niður, þarf tillaga samþykki 2/3 atkvæðisbærra fundarmanna á tveimur aðalfundum, og skal á þeim fundum taka ákvörðun um ráðstöfun á eignum félagsins. Félagsmenn eiga ekki tilkall til eigna félagsins.

Lög þessi voru samþykkt á aðalfundi Sáttar þann 27. maí 2025.